

Goibekokale

ELGETA / Barikua / 2005eko irailaren 23a / 239. zenbakia

KOORDINATZAILEA: Irati Agirreazaldegia • Barrenkalea 33 BERGARA 20570 • Tel.: 943 25 05 02 • Faxa: 943 25 05 13 • Posta elektronikoa: goibekokale@goiena.com • Lege gordailua: SS475/95



Umeek karate eta oinarrizko soin hezkuntza eskolak jaso ahal izango dituzte.

Kirol ikastaroetan izena emateko epea zabalik

IRATI AGIRREAZALDEGI

Udal Kirol Zerbitzuak prest dauka ikasturte berrirako kirol eskaintza. Yoga, tai-chi, aerobik, sasoiaren egoteko gimnasia, erretiratuendako gimnasia, karate eta oinarrizko soin hezkuntza ikastaroak daude aukeran. Urriaren 3an eta 4an hasiko dira.

Udal Kirol Zerbitzuan irailaren 30era arteko epea dago ikasturte berriko kirol jardueretan izena emateko. Interesatuak udal txerara jo behar dute horretarako. Joan den ikasturtean kirol zerbitzuetan jardun zuten elgetarrek izena ematearekin nahiko dute; gainontzekoek euren datuekin orria bete behar dute. Esku orriak Bolatoki tabernan edo Udal Kirol Zerbitzuan bertan eskura daitezke.

Ordainketak banketxean egin behar dira, guztiak, edadetuendako soinketa ikastarokoan izan ezik. Haiek udaletxean bertan ordaindu beharko dituzte,

hilero 5,30 euro. Gainontzeko ikastaroen prezioak jarduera bakoitzaren arabera dira: Yoga ikastaroa egiteko 20 euro ordaindu behar dira hilean; tai-chi eta aerobik saioak 15 euro inguru; sasoiaren egoteko gimnasia ikastaroa 9,5 euro. Umeendako prezioak merkeagoak dira: karatean jarduteko ikasturte osorako 10 euro ordaindu behar dira; oinarrizko soin hezkuntza eskolak jasotzeko, berriz, 20 euro.

Yoga eta tai-chi ikastaroak astelehen eta eguaztenetan izango dira eta aerobik saioak, martitzen eta eguaztenetan. Ikastaro horiek 15 urtetik gorakoentzako izango dira. Sasoiaren egoteko

Ikastaroak urriaren 3an eta 4an hasiko dira; kiroldegian egingo dituzte saioak

gimnasiako saioak 16 eta 60 urte bitartekoentzako dira eta martitzen eta eguaztenetan egingo dituzte kiroldegian.

UMEAK ETA EDADETUAK

Adinekoek eta umeek ere izango dute kirolerako aukerarik. Erretiratuendako gimnasia saioak martitzen eta eguaztenetan izango dira. Karateko hastapen eskolak 8 eta 12 urte bitarteko neska-mutilek jasoko dituzte, martitzenetan. 6 eta 8 urte bitarteko umeendako, berriz, oinarrizko soin hezkuntza saioak izango dira, eguaztenetan.

Ikastaroak egin ahal izateko gutxienez zortzi laguneko taldeak osatu beharko dira.

OBRAK

Kiroldegian egingo dira ikastaroak baina obrak direla eta urritik azarora bitartean itxi egingo dituzte instalazioak. Tarte horretan Herri Eskolan egingo dituzte kirol saioak, baina horren berri interesatuei emango zaie, behar den garaian.

UDALA

Dirulaguntza eskaera udal proiektuetarako

I.A.

Hirigintza, Obra eta Ingurumen batzordearen azken bileran erabaki zuen Udalak Eusko Jaurlaritzari hainbat dirulaguntza eskaera egitea. Laguntza horietariko batzuk proiektuak gertatzeko izango dira eta eraginkortasun energetikoa hobetzeko besteak.

Hainbat proiektu gertatzeko asmoa du Udalak, eta horretarako dirulaguntza eskaera egingo dio Eusko Jaurlaritzari.


Udalaren asmoen artean dago Artekalean urarendako hodia sartzeari; lan horiek egitean, herri sarrerako arkutik Uriburura hodia ez ezik beste hainbat azpiegitura ipini nahi ditu Udalak. Bestalde, kale horretan, lehen

Salbador kalean egin zen bezala fatxadak berritu nahi dituzte horretarako bideragarritasun plana egin behar da.

Torrezahar aurreko udal berritzeko proiekturako; udaletxean berrikuntza lanak egitea eta herri altzarietarako (Madrako parkerako eta Eskolatik Espaloiarako) eskaileretako barandak ere izango dira laguntzak.

ERAGINKORTASUN ENERGETIKOA

Udaletxean eta kultur etxean berogailu sistema aldatu egiten zuten energia aurrezteko; gasolioa erabiltzetik gasa erabiltzera pasa ziren. Orain, kiroldegian tabernan ere gauza bera egingo kotan dira. Eraginkortasun energetikoa hobetzeko inbertsio izanik, horretarako ere dirulaguntzak eskatuko ditu Udalak.



Salbador kalean bezala Artekalean fatxadak berritzeko proiektua egin nahi dute.

LABUR

Osteoporosi gaitzaren gaineko hitzaldia eguazten arratsaldean udaletxean

Kutxa Gizarte Ekintzak antolatuta, osteoporosiaren gaineko hitzaldia emango du Jose Luis Martinek datorren eguaztenetan, irailaren 28, 17:00etan udaletxean. Hitzaldi honekin giharretako eta urtarretako hainbat gaixotasun eman nahi dira ezagutzera. Gaixotasun sintomak nola antzeman azaltzeaz gain, gaixotasuna jasaten dutenek eguneroko bizitzara moldatzen laguntzeko argibideak emango dizkiete, besteak beste. Hitzaldia edozein herritarrentzako da.

KULTURA

Urritik abendura bitarteko kultur egitaraua gertu dute Espaloian

I.A.

Espaloia Kafe Antzokiak gertu du datozen hiru hilabeteetarako egitaraua kulturala. Deba jazz musika taldeen lehiaketa; hainbat antzerki lan; erakusketak; ikastaroak; eta kultur arloko beste zenbait ekintza izango dira urritik abendura bitartean.

Antzerki lan entzutetsuak ekarri ohi dituzte Espaloira, eta datozen hilabeteetan ere hala egingo dute. Yllana taldearen 666 obra ikusi ahal izango da urriaren 14an, eta 28an Txalo taldearen *Pakitaren-tzat bakarrik* lana. Azarorako eta abendurako, berriz, honako lanak daude iragarrita: *Zanguangoren Pan con pan*; *Txakur beltz handi eta iletsua txotxongilo* lana; eta Ttanttakaren *Shakespeare osoa gutxi gorabehera*.


MUSIKA

Ekitaldien artean leku esanguratsua izango dute musika emaldiek ere.

Deba Jazz musika lehiaketako saioak urriaren 8an eta 9an izango dira eta lehiaketa amaitzeko kontzertua, berriz, azaroren 4an, Bill Evansekin.

Udalak, bi jazz emanaldi antolatatu ditu: urriaren 21erako bat eta azaroren 25erako bestea.

Urriaren 18an musika arloko hitzordu garrantzitsu bat egongo da. *Ehungarrenean hamaika: Lauaxeta 2005* ikuskizuna. Mikel Urdangarin, Gari, Eñaut Eloorrieta, Rafa Rueda, Jabier Mugurutz, Anje Duhalde, Txuma



GOIENKARIA


Gari kantariak *Ehungarrenean hamaika* ikuskizunean hartuko du parte.

Murugarren, Petti, Xabier Montoia, Xabi Strubell eta Francis Diezek jardungo dute kantuan.

Abenduaren 16an, berriz, Aterkings eta Señor No taldeen kontzertua izango da.

Erakusketak bi izango dira: margolanena bat eta zeramikena bestea.

Horiez gain, diapositiba emaldia, dantza saioa, josten ikasteko ikastaroa, kirol topaketak eta itzultzaileen mintegia izango dira, besteak beste. Sarrera behar duten ekitaldietarako Espaloian bertan erosia ahal izango dira txartelak, eta baita telefonoz eskatu eta saioa baino 15 minutu lehenago jaso.



Antzinako arku Maalako parkearen sarreran

Maala inguruan parkea egiten dihardute; eta San Roke kaletik sarrera egongo da parke horretara. Sarrera berezia izango du. Izan ere, arku gotikoa ipini dute bertan; Aixola Behekoa baserriko arku, hain zuzen ere. Aixolako urtegia egiteko lanak hasi aurretik Juan San Martinek arku horren berri eman zion Udalari. Udala egin zen arkuaren jabe eta orain egokia iruditu zaio parkearen sarrera ipintzea. Bestalde, plaka bat ere jarriko dute arkuaren jatorria azalduz. /I.A.

JAIK

Kupel bat lapurtu zuten Sagardo egunean

I.A.

Sagardo eguna giro onean ospatu zuten zapatuan Elgetan. Patata tortilla lehiaketan 20 taldek hartu zuten parte, eta sagardoa gogotik edan zuten elgetarrek; 250 sagardo edalontzi saldu ziren. Baina izan zen ezustekorik ere: goizaldean kupel bat lapurtu zuten.

Zazpi kupel ipini zituzten herriko hainbat tabernatan eta plazan gaztetxeok. Afalostean denak batu zituzten, Espaloian ipinitakoa izan ezik; hura izan zen, hain zuzen ere, goizaldean lapurtu zutena.

Gainontzean, giro onean joan zen sagardo eguna eta aipatzekoa da patata tortilla lehiaketan izan zen parte-hartzea: 20 talde guztira. Liyu taldea izan zen irabazle, eta bigarren Arrasateko gaztetxea; haiek tortillarik originalearen saria ere jaso zuten. Hirugarren tokian Fly taldea sailkatu zen. Hona hemen sailkapena:

Sailkapena

1. Liyu
2. Arrasateko gaztetxea
3. Fly
4. J.A.
5. Kiniela zaleak
6. Esna hadi
7. Elgetako gaztetxea
8. Aralar
9. Mikeljoxep
10. Frutititi "iragoira"
11. Izen barikoak
12. Simpsondarrak
13. La kuadri
14. Auzolanian
15. Hamabost frutituti
16. Euskal IRP
17. Atsotitzak 2
18. Tutifruiti
19. Fruti
20. Ponpopoti



I.A.

Tortilla lehiaketan 20 taldek hartu zuten parte.

LABUR

Mendi inguruak garbitzeko irteera antolatu du Maya ingurumen taldeak domekarako

Maya ingurumen taldeak datorren domekan, irailaren 25ean, Elgetako inguruak garbitzeko asmoa dauka. Astean taldekoak herri inguruan ibili dira premiarik handien non dagoen ikusten. Besteak beste, Asentzio eta Arantzeta inguruetara joango direla esan digute. Bertan zaborra jasotzea da asmoa. Orain dela urte batzuk gaztetxeok antolatuta egin zen garbiketa, baina berriz ere beharra dagoela ikusi dute Mayakoek. Garbiketaren parte hartu nahi dutenei dei egiten diete egunean bertan 09:30ean herriko plazan azaltzeko, eta bertatik abiatuko dira.

Urriaren 3an hasiko dira euskara ikastaroak, eta oraindik izena eman daiteke

Udalak euskara ikastaroak ipiniko ditu abian datorren urriaren 3an. Eskaerak aztertu ostean, taldea osatu da eta taldearen baitan bi maila bereizi dituzte: oinarrizko maila, hutsetik hasi nahi dutenentzako; eta beste maila bat ezagutza badutenentzako. Eskolak astelehenean bitartean izango dira, 18:00etatik 20:00etara. Lehen saioa kultur etxean egingo dute, baina baliteke gero ikastaroak eskolan izatea. Ikastaroa egiteko interesa dutenek oraindik izena emateko aukera dutela esan digute udaletxean. Horretarako, urriaren 3an bertan kultur etxera joan eta irakaslearekin hitz egin beharko dute.